

# Diskursu PM Taur Matan Ruak iha Simeira Dahuluk kona-ba Petróléu no Gás Timor-Leste nian

3 Outubru 2019



Primeiru-Ministru, Taur Matan Ruak. Imajen/TATOLI

Exelénsia sira,

Maun Boot Kay Rala Xanana Gusmão,

Dr. José Ramos Horta,

Membru sira Governu Konstitusionál da-VIII

Ilustre Prezidente Bankada Parlamentár nian sira (CNRT, Fretilin, PLP, PD, Khunto, Frente Mudança-UDT, no PUDD)

I lustre Deputada no Deputadu sira Parlamentu Nasionál nian

Embaixadór no Diplomata sira,

Ilustre delegadu, konvidadu no partisipante sira, Senhor no Senhora sira

Sai onra no priviléjiu boot ida mai ha'u bele prezide serimónia inaugurasun ba edisaun dahuluk hosi Simeira kona-ba Petróléu no Gás Timor-Leste nian, ne'ebé organiza hosi Autoridade Nasionál Petróléu no Minerais (ANPM), ne'ebé mak ha'u agradese tebetebes ba imi-nia Amável konvite.

Eventu ne'e representa marku importante ida iha jornada Timor-Leste nian atu bele sai nu'udar destinu preferensial ba negosiu sira no investimentu iha Sudeste Aziatiku, iha area sira esplorasun no produsaun petroleu no gas nian, no numeru partisipante ne'ebe barak tebetebes maka sai hanesan prova ida katak Timor-Leste sai nu'udar destinu preferensial ba negosiu sira no investimentu.

Ami fiar katak, hahu ohin ba tinan balu tan, ema hotu sei hanoin katak loron ida-ne'e nu'udar loron ida ba determinasaun no responsabilidade, ne'ebe decide tiha ona dalan sira ba Timor-Leste hodi alkansa ninia rekonosimentu ne'ebe maka nia merese duni, hanesan ator importante ida iha industria internasional petroleu no gas nian.

Simeira Dahuluk ida ne'e kona-ba Petroleu no Gas Timor-Leste nian akontese daudaun iha momentu ida krusial ba ita-nia rain ninia dezvoltimentu, progresu no modernidade.

Ita konsege to'o akordu ida ho ita-nia pais viziñu, Commonwealth Australia nian, kona-ba estabesimentu fronteira maritima ida-ne'ebe permanente entre nasaun rua, nune'e taka ona kapitulu ida ne'ebe importante tebetebes ba ita-nia istoria, ne'ebe dura tempu barak nia laran.

Esforsu estrordinariu ne'ebe hala'o ona husi pais rua ne'e hodi alkansa Tratadu Fronteira Maritima foun no aseitasaun jerál Tratadu ne'e nian hatudu katak nasaun sira bele hakat liu difikuldade politika atu buka interese di'ak liutan ba sira-nia povu.

Ita agora hahu tempu foun ida iha relasaun entre Timor-Leste no Commonwealth Australia nian, ne'ebe promete no iha potensial atu kria futuru di'ak liu ba moris-di'ak sidadaun sira-nian no atu diversifika ekonomia Timor-Leste nian.

Projetu Greater Sunrise, ne'ebe iha potensial boot, ita hakarak arranka iha inisiu tinan 2020 no sei husik paralizaun ne'ebe maka dura tempu naruk.

Ba sira ne'ebe mak investe tiha ona iha esplorasun no produsaun husi ita-nia rekursu petroliferu sira offshore, ha'u hakarak garante katak imi-nia atividade sira bele no sei kontinua sein obstakulu, iha periodu hafoin tranzisaun husi Area Konjunta Dezvoltimentu Petroliferu antiga (ne'ebe koñese ho sigla JPDA-sigla, iha lian ingles) ba jurizdisaun eskruziva Timor-Leste nian.

Loos duni, Governu daudaun ne'e aprova ona pakote lejizlativu ida atu garante tranzisaun ida-ne'ebe kaman no efisiente, hodi respeita no proteje imi-nia direitu no espetativa lejítima tomak.

Iha biban hanesan, Governu hala'o hela reforma lejizlativa ida ne'ebe seria no abranjente, ho objetivu atu moderniza kadru juridiku ne'ebe eziste ona no liña nia ho sistema juridiku sira ne'ebe avansadu liu iha mundu, ne'ebe importante tebes ba konstrusaun sistema juridiku ida ne'ebe maka maduru, bazeia ba Estadu Direitu nian, no esensial atu kria konfiansa no fo estabilidade no seguransa juridika ba investimentu estranjeiru sira.

Ida-ne'e hanesan mos momentu ida-ne'ebe loos duni atu fo hakat ida ba oin.

Ita-nia Konstituisaun obriga Estadu atu uza rekursus naturais, hodi garante repartisaun ida-ne'ebe justa no ekuitativa husi rekursu sira-ne'e, bazeia ba supremu interese nasional.

Ita boot sira ne'e mak ema profisional, matenek na'in no espesialista sira ne'ebe

iha esperiénsia no hatene didi'ak kona-ba kna'ar importante ne'ebé maka petróleu dezempeña nafatin iha desenvolvimentu no moris-di'ak ba ami nia país foun ne'e.

Timor-Leste hetan duni grasa boot ho rezerva petróleu ne'ebé significativa, no parte importante ida husi rezerva ne'e seidak explora.

Governu ne'e kompromete-án tomak atu asegura katak ami nia bensa ne'e sai nu'udar fonte oportunidade no sei la nakfilak ba maldisaun.

Maske nune'e, susesu iha kumprimentu mandatu konstitusionál ezije katak Governu servisu hamutuk no besik liu ho investidór sira, hodi dada empreza foun, iniciativa no parseria sira desenvolvimentu nian.

Kooperasaun durante tempu naruk entre Timor-Leste no empreza internasionál sira hanesan ConocoPhillips no nia Asosiada sira iha operasaun petrolífera iha kampu produsaun Bayu **Undan** nian, daudaun ne'e, no iha kampu EKKN (Elang-Kakatua-Kakatua North) iha tempu liubá, ho Eni SpA no nia Asosiada sira iha operasaun petrolífera iha kampu Kitan, no ho Woodside Energy no nia Asosiada sira daudaun ne'e, no mós ho empreza sira esplorasau nian iha tempu liubá no daudaun ne'e, estabelese ona baze ida-ne'ebé di'ak ba desenvolvimentu indústria petrolífera iha Timor-Leste. Parseria sira ne'e estabelese ona dalan di'ak ida ba sira ne'ebé foin tama iha área ne'e, no daudaun ne'e hala'o hela operasaun esplorasau sira hanesan Timor Resources, Carnarvon, nune'e mós ita-nia Empreza Nasionál Petróleu nian.

Ho konsiderasaun ba ne'e, Governu – liuhusi Dekretu Regulamentár ida no Orden ida hosi Sua Exelénsia Ministru Petróleu – aprova ona alokasaun bloku foun sanulu-resin-ualu ba atividade petrolífera sira. Husi bloku hirak-ne'e, hitu lokaliza iha rai (onshore) no sanulu-resin-ida lokaliza iha tasi (offshore) iha Timor-Leste nia zona eskuziva.

Iha tempu badak sei lansa no kondús prosedimentu sira lisitasaun públika nian hosi ita-nia Autoridade Nasionál Petróleu no Minerais (ANPM), nu'udar reguladóra ba setór petróleu nian.

Ida ne'e maka ronda lisenasiamentu sira ne'ebé ita hotu hein durante tempu naruk, hafoin liu tiha dékada ida, bainhira Timor-Leste hala'o ba dahuluk ninia ronda lisenasiamentu iha tinan 2005/2006, tanba ne'e ha'u konvida imi-hotu atu partisipa no mai hamutuk ho Timor-Leste iha konstrusaun futuru ida ne'ebé di'ak liu ba nia povu.

Ha'u hein katak durante eventu loron rua nian ne'e, partisipante no delegadu sira hotu bele uza tempu ne'e ho di'ak hodi aumenta rede kontaktu sira ne'ebé di'ak liután ba parseria komersiál sira iha futuru.

Ha'u laiha dúvida katak ami nia país, ne'ebé nakonu ho enerjia, bele sai interese maka'as ba Ita-Boot sira no ba ita-Boot sira-nia empreza, no katak, ita hamutuk, bele kontinua hametin Timor-Leste nia dalan ba inovasaun no prosperidade.

Ha'u hakotu ha'u nia diskursu ho agradesimentu ba membru sira komisaun organizadora ne'ebé lidera hosi Autoridade Nasionál Petróleu no Minerais (ANPM) no IN-VR (INVIAR), hein katak konferénsia dahuluk ida ne'e, no ba sira seluk ne'ebé sei tuirmai, lori proveitu no satisfasaun ba ita tomak.

Obrigadu Barak!

Nai Maromak haraik bensa mai ita-hotu!